



Godina I - Broj 7

Subota, 20. juna 1992.
SARAJEVO

Akontacija pretplate
za 1992. godinu 3.900 dinara
Žiro-račun 10100-603-1396

156

Na osnovu Amandmana LI tačka 5. stav 3. na Ustav Republike Bosne i Hercegovine, na prijedlog Vlade Republike Bosne i Hercegovine, Prijedsjedništvo Republike Bosne i Hercegovine, donosi

UREDBU SA ZAKONSKOM SNAGOM

O DOPUNI UREDBE SA ZAKONSKOM SNAGOM O ORUŽANIM SNAGAMA REPUBLIKE BOSNE I HERCEGOVINE

Član 1.

U Uredbi sa zakonskom snagom o oružanim snagama Republike Bosne i Hercegovine (»Službeni list RBiH«, broj 4/92), u članu 4. iza stava dva dodaje se stav tri, koji glasi:

»Profesionalni rad kadrova u Armiji uređuje se posebnom uredbom sa zakonskom snagom o službi u Armiji«.

Stav 3. postaje stav 4.

Član 2.

Ova odluka stupa na snagu danom objavljivanja u »Službenom listu RBiH«.

PR. broj 01-011-1163/92
17. juna 1992. godine
Sarajevo

Predsjednik
Predsjedništva RBiH,
Alija Izetbegović, s.r.

157

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici održanoj 17. juna 1992. godine, donijelo je

ODLUKU

O OBRAZOVANJU DRŽAVNE KOMISIJE ZA KONTROLU ZAKONITOSTI POSTUPANJA PRIPADNIKA TERITORIJALNE ODBRANE I POLICIJE

I

Obrazuje se Državna komisija za kontrolu zakonitosti postupanja pripadnika teritorijalne odbrane i policije u postupku:

- pozivanja, ispitivanja i lišavanja slobode građana,
- ličnog pretresa građana, stanova, poslovnih i drugih prostorija,
- privremenog oduzimanja sredstava i opreme građana i pravnih lica.

U komisiju se imenuju:

1. Simović Miodrag, potpredsjednik Vlade Republike BiH
2. Nikolić Ranko, ministar za pravosuđe i upravu
3. Džihanović Šahbaz, sekretar Vlade Republike BiH
4. Dautbašić Sead, sekretar Sekretarijata za zakonodavstvo Vlade Republike BiH
5. Raguž Martin, predsjednik Vrhovnog suda BiH
6. Knežević Zdravko, republički javni tužilac
7. Pušina Jusuf, ministar unutrašnjih poslova Republike BiH
8. Bulić Žarko, predsjednik Advokatske komore Bosne i Hercegovine
9. Galijatović Ekrem, predsjednik Upravnog odbora Advokatske komore Bosne i Hercegovine.

Predsjednik komisije je dr Miodrag Simović.

Komisija imenuje sekretara Komisije.

Komisija će donijeti pravila o svome radu.

Komisija počinje sa radom odmah.

Sjedište Komisije je u Sarajevu.

Sredstva za rad Komisije obezbijediće se u Budžetu Republike Bosne i Hercegovine.

II

Komisija je dužna da samoinicijativno, ili na prijedlog građana, odnosno pravnih lica, ispita svaki slučaj predstavke odnosno zahtjeva iz tačke I ove odluke i da o tome redovno obavještava nadležne organe čija su lica povrijedila zakonitost

u radu kao i da Predsjedništvu Republike Bosne i Hercegovine podnosi informaciju odnosno izvještaje o svom radu.

III

Državni i drugi organi i institucije kao i građani dužni su da na zahtjev Komisije stave na uvid sve tražene podatke i informacije od značaja za rad Komisije i da Komisiji pružaju punu pomoć u njenom radu.

IV

Ova uredba stupa na snagu danom objavljivanja u »Službenom listu RBiH«.

PR. broj 02-011-417/92
17. juna 1992. godine
Sarajevo

Predsjednik
Predsjedništva RBiH,
Alija Izetbegović, s.r.



158

Polazeći od činjenice da je na Republiku Bosnu i Hercegovinu izvršena agresija od strane Republike Srbije, Republike Crne Gore, Jugoslovenske armije i terorista Srpske demokratske stranke,

- da je činjenica agresije utvrđena od strane Savjeta bezbjednosti Ujedinjenih nacija, Rezolucijom broj 752 od 18. maja 1992. godine,

- da se ta agresija nastavlja i nakon usvajanja pomenute Rezolucije Savjeta bezbjednosti,

- da je agresija praćena brutalnim genocidom nad narodom Bosne i Hercegovine, kao posljedica čega je do sada ubijeno preko 40 hiljada ljudi, prisilno raseljeno oko milion i 400 hiljada stanovnika, a njih preko 60 hiljada odvedeno u koncentracione logore,

- da agresor organizovano nastavlja da razara civilne, privredne, vjerske i druge objekte,

- da je agresor okupirao oko 70% teritorije države Bosne i Hercegovine i da odbija da obustavi agresiju,

- i polazeći od prava na odbranu koje je priznato po međunarodnim zakonima.

Predsjedništvo Republike Bosne i Hercegovine, na osnovu amandmana LI tačka 5. stav 3. na Ustav Republike Bosne i Hercegovine, na sjednici održanoj 20. juna 1992. godine, donijelo je

ODLUKU

O PROGLAŠENJU RATNOG STANJA

1. Na teritoriji Republike Bosne i Hercegovine proglašava se ratno stanje,

2. Proglašavanje ratnog stanja ima za cilj da se, na osnovi prava građana na individualnu i kolektivnu samoodbranu, omogući efikasnije angažovanje svih ljudskih i materijalnih potencijala u domovini i inostranstvu radi njihovog stavljanja u funkciju oslobađanja Republike Bosne i Hercegovine od agresora, kao i radi uspostavljanja narušenog pravnog poretka i stvaranja uslova za povratak svih prognanih stanovnika Bosne i Hercegovine na njihova ognjišta.

3. Ovlašćuju se oružane snage Bosne i Hercegovine da preuzmu potrebne mjere na organizovanju opštenarodnog otpora radi ostvarivanja postavljenih ciljeva.

4. Republika Bosna i Hercegovina će se pridržavati odredaba međunarodnog prava i međunarodnih konvencija koje regulišu ponašanje država u ratnom stanju, te u skladu sa članom 51. Povelje Ujedinjenih nacija, uvažavati odluke i inicijative Savjeta bezbjednosti koje on donese radi uspostavljanja i

održavanja međunarodnog mira i sigurnosti. Republika Bosna i Hercegovina će zajedno sa Savjetom bezbjednosti UN, Evropskom zajednicom i drugim međunarodnim institucijama nastaviti da traga za mirnim rješenjem sukoba u Bosni i Hercegovini putem pregovora koje će biti u skladu sa njenim dostojanstvom, nezavisnošću, integritetom i cjelovitošću. U tom pogledu ona ostaje otvorena svim relevantnim inicijativama.

5. O ovoj odluci Predsjedništvo Republike Bosne i Hercegovine će obavijestiti Savjet bezbjednosti Ujedinjenih nacija.

6. Ova odluka stupa na snagu danom objavljivanja u »Službenom listu RBiH«.

PR. broj 1201/92
20. juna 1992. godine
Sarajevo

Predsjednik
Predsjedništva RBiH,
Alija Izetbegović, s.r.



159

Na osnovu člana 8. Uredbe sa zakonskom snagom o odbrani, (»Službeni list RBiH«, broj 4/92), na prijedlog Glavnog štaba oružanih snaga Republike Bosne i Hercegovine, Predsjedništvo Republike Bosne i Hercegovine na sjednici od 20. juna 1992. godine, donijelo je

NAREDBU

O PROGLAŠENJU OPŠTE JAVNE MOBILIZACIJE NA TERITORIJI REPUBLIKE BOSNE I HERCEGOVINE

I

Naređuje se opšta javna mobilizacija svih vojnih obveznika na teritoriji Republike Bosne i Hercegovine, starosti od 18 do 55 godina, koji su dužni da se sa vojnom opremom i ličnim naoružanjem odmah jave u najbližu jedinicu Teritorijalne odbrane.

II

Naređuje se opšta javna mobilizacija svih ostalih radno sposobnih građana Republike Bosne i Hercegovine, starosti od 18 do 65 (muškarci), odnosno 18 do 55 (žene) da se bez odlaganja jave u jedinice civilne zaštite, koje će u skladu sa odredbama Uredbe sa zakonskom snagom o odbrani otpočeti sa izvršavanjem zadataka.

III

Naređuje se svim imaoacima materijalnih sredstava koja podliježu popisu za potrebe odbrane, da sva sredstva bez odlaganja stave na raspolaganje najbližoj jedinici Teritorijalne odbrane, koja će se koristiti za potrebe izvršavanja borbenih zadataka.

IV

Naređuje se svim javnim preduzećima zavedenje neprekidne radne obaveze, u cilju obezbjeđenja funkcionisanja života.

V

Naređuje se uvodenje radne obaveze u preduzećima, samostalnim zanatskim i drugim radnjama, koji su dužni da obezbijede neprekidan rad i funkcionisanje i radno vrijeme od najmanje osam sati dnevno u skladu sa vlastitom odlukom i situacijom koju nalaže ratno stanje.

VI

Za izvršenje ove naredbe odgovoran je komandant Teritorijalne odbrane Republike Bosne i Hercegovine, koji će preko organa Glavnog štaba i drugih nadležnih organa obezbijediti potpuno i odgovorno izvršenje ove naredbe.

VII

Svako nepoštovanje ove naredbe povlači krivičnu i drugu odgovornost u uslovima ratnog stanja, u skladu sa zakonom.

VIII

Ova naredba stupa na snagu danom objavljivanja u »Službenom listu RBiH«.

PR. broj 1200/92
20. juna 1992. godine
Sarajevo

Predsjednik
Predsjedništva RBiH,
Alija Izetbegović, s.r.

160

Na osnovu člana 188. Zakona o državnoj upravi (»Službeni list SRBiH«, br. 8/90, 22/90, 10/90 i 14/91 i »Službeni list RBiH«, broj 4/92), Vlada Republike Bosne i Hercegovine, na 203. sjednici održanoj 16. juna 1992. godine, donijela je

RJEŠENJE

O RAZRJEŠENJU POMOĆNIKA MINISTRA ODBRANE

Razrješava se Dragomir Mrković dužnosti pomoćnika ministra odbrane, na lični zahtjev.

Ovo rješenje objaviće se u »Službenom listu RBiH«.

Broj 203-1/92.
16. juna 1992. godine
Sarajevo

Predsjednik
Vlade RBiH,
Jure Pelivan, s.r.

161

Na osnovu člana 188. Zakona o državnoj upravi (»Službeni list SRBiH«, br. 8/90, 22/90, 10/90 i 14/91 i »Službeni list RBiH«, broj 4/92), Vlada Republike Bosne i Hercegovine, na 203. sjednici održanoj 16. juna 1992. godine, donijela je

RJEŠENJE

O POSTAVLJENJU POMOĆNIKA MINISTRA ODBRANE

Za pomoćnika ministra odbrane za pravne i upravne poslove postavlja se MILENKO LEPUŠINA.

Ovo rješenje objaviće se u »Službenom listu RBiH«.

Broj 203-2/92
16. juna 1992. godine
Sarajevo

Predsjednik
Vlade RBiH,
Jure Pelivan, s.r.

162

Na osnovu člana 7. Zakona o prestanku važenja Zakona o sudovima udruženog rada (»Službeni list RBiH«, broj 4/92), ministar pravosuđa i uprave, donosi

UPUTSTVO

O NAČINU PREUZIMANJA RADNIKA I PREDMETA, ARHIVE I DOKUMENTACIJE SUDOVA UDRUŽENOG RADA

1. Preuzimanje radnika osnovnih sudova udruženog rada i Suda udruženog rada Bosne i Hercegovine, koji se na dan 30.

juna 1992. godine zateknu na radu u ovim sudovima izvršiće se u skladu sa članom 4. Zakona o prestanku važenja Zakona o sudovima udruženog rada (u daljem tekstu: Zakon).

Predsjednici sudova koji preuzimaju radnike izvršiće privremeni raspored radnika iz stava 1. ove tačke. Nakon donošenja akta o unutrašnjoj organizaciji suda izvršiće se konačan raspored radnika.

Radnici koji ne budu raspoređeni na poslove i zadatke prema odredbi stava 3. ove tačke ostvaruju svoja prava iz radnog odnosa po propisima koji se odnose na radnike ukinutih organa uprave.

2. Preuzimanje predmeta osnovnih sudova udruženog rada i Suda udruženog rada Bosne i Hercegovine izvršiće se 30. juna 1992. godine u skladu sa članom 3. Zakona.

3. Ustupljene predmete nadležni osnovni i viši sudovi upisuje u odgovarajuće upisnike po hronološkom redu prijema i u rubrici »primjedba« naznačiti od kojeg suda su predmeti primljeni.

4. Sudovi udruženog rada iz člana 3. Zakona predaće 30. juna 1992. godine nadležnom osnovnom ili višem sudu cjelokupnu arhivu i dokumentaciju koja se odnosi na predmete u kojima je do tog dana postupak pravosnažno okončan.

5. O primopredaji predmeta, arhive i dokumentacije u smislu ovog uputstva, sastavlja se zapisnik.

Zapisnik iz stava 1. ove tačke sadrži: oznaku datuma kad se primopredaja vrši i imena i svojstva lica koja primopredaju vrše, oznaku predmeta, arhive i dokumentacije koji se predaju, odnosno primaju i potpise lica koja su primopredaju izvršila. U zapisniku se posebno iskazuju riješeni a posebno neriješeni predmeti, s tim što će se popis predmeta izvršiti za svaki referat, po hronološkom redu prijema.

Zapisnik iz stava 1. ove tačke sastavlja se u tri primjerka, od kojih jedan ostaje sudu koji vrši predaju predmeta, drugi sudu koji vrši prijem predmeta, a treći primjerak se dostavlja Ministarstvu pravosuđa i uprave.

6. Troškove primopredaje predmeta, arhive i dokumentacije snose sudovi koji preuzimaju predmete u smislu ovog uputstva.

7. O sprovođenju ovog uputstva staraće se predsjednici sudova.

8. Ovo uputstvo stupa na snagu danom objavljivanja u »Službenom listu RBiH«.

Broj 01-700-23/92.
20. juna 1992. godine
Sarajevo

Ministar
Ranko Nikolić, s.r.

SADRŽAJ

156 Uredba sa zakonskom snagom o dopuni Uredbe sa zakonskom snagom o oružanim snagama Republike Bosne i Hercegovine	233	159 Naredba o proglašenju opšte javne mobilizacije na teritoriji Republike Bosne i Hercegovine	234
157 Odluka o obrazovanju Državne komisije za kontrolu zakonitosti postupanja pripadnika Teritorijalne odbrane i policije	233	160 Rješenje o razrješenju pomoćnika ministra odbrane	235
158 Odluka o proglašenju ratnog stanja	234	161 Rješenje o postavljenju pomoćnika ministra odbrane	235
		162 Uputstvo o načinu preuzimanja radnika i predmeta, arhive i dokumentacije sudova udruženog rada	235